

բամնոց : Եւ 'ի միւս կողմանէ տաղտկացեալ և զգուեալ էր 'ի բռնութենէ այլազգեաց , և կոչէր զերուսաղէմ ասպարէզ ազահաց և զրկողաց , և կամք իւրաքանչիւրոց՝ օրէնք , և բռնութիւն զիրաւունս ոչ ճանաչէ , և թէ ուր բռնութիւն՝ անդ չիք արդարութիւն , զի չէր հանգիստ գոնէ ժամ մի ինքեան և կառավարչաց Աթոռոյն յերեսաց կեղեքչաց . ոչ աղաչանաց լսէին , ոչ աղքատութեան ողորմէին , չգիտէին զայլ ինչ , բայց միայն խնդրել պարգեւս որում չէր կէտ և սահման , զի զոր կամէինն՝ զայն խնդրէին . եթէ ընդդիմանային՝ բանային դրունս մեծամեծ վնասուց յայտնի և ծածուկ՝ յորոց վերայ զարմանայր Պօղոս՝ զի ոչ գիտէր , բայց ետես և ուսաւ . երանի թէ ասէ՝ յառաջագոյն ուսանէի , զի թերեւս ոչ անկանէի յայս վիշտ անտանելի : Եւ զի զկնի ամսոյ ինչ պիտոյ էր նմա 258, 255 դահեկան միայն վասն երկրորդ բաժնի պարտուց , թող զայլս որք ոչ կամէին մտանել ընդ բաժնիւ , և 'ի Կոստանդինուպօլսոյ չեղեւ ինչ օգնութիւն , որպէս խոստացեալն էին , եւ Յովնաննէս վարդապետ ոչ ինչ առաքեաց յերուսաղէմ՝ զոր ժողովեաց 'ի վիճակաց . և 'ի չքաւորութենէ յաճախէին փոխյայք 'ի վերայ Փոխանորդին՝ յորոց բազմացան նեղութիւնք և տրտունչք յերկուց կողմանց , զի փոխանակ չահելոյ՝ առաջի կայր նոցա վնաս մեծ , նմին իրի ստիպէին զազգայինս գրել առ Առաջնորդս վիճակաց հասուցանել դրամ . և Չաքարիա վարդապետի ժողովել 'ի Կոստանդինուպօլիս . զի եթէ ոչ կամէին տալ ազգայինք մէն մի դրամ 'ի տարին վասն պարտուց Երուսաղէմի , զի՞նչ կարէին առնել որք բարձին զայն ծանր լուծ 'ի թիկունս իւրեանց այսպիսի անօրինակ խռովեալ ժամանակի . զի աղաղակ և տրտունջ Առաջնորդաց և ժողովրդոց առհասարակ զերկինս գրաւէին 'ի դառնութենէ ժամանակին : Այլ յուսացեալ 'ի խնամս և 'ի գթութիւնս հոգեսէր ժողովրդոցն Հայոց , առաքեցին յերուսաղէմէ՝ Վարդապետս 'ի կողմանս Գաղատիոյ , Եւզոկիոյ և յայլ քաղաքս՝ և յաշխարհն Կիլիկիոյ , գրեալ զիր աղաչանաց և յորդորանաց հոգալ վասն երկրորդ բաժնին : Սակայն ոմանք 'ի պարտուց էին տեսակ ընդ տեսակի՝ որոց տուեալ շահն անցեալ էր քան զմայր գումարն , եւ եթէ այնպիսեաց չիցէ փոխեալ մուրհակն՝